



საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

მენჯი, კურორტი

მენჯი, ბალნეოლოგიური კურორტი სამეგრელო-ზემო სვანეთის მხარის სენაკის მუნიციპალიტეტში, მდ. ცივის ხეობაში, ზ. დ. 29 მ. კურორტი მდებარეობს სენაკიდან - 5, ზუგდიდიდან - 50, თბილისიდან - 295 კმ-ში. ჰავა სუბტროპიკულია, რბილი. იცის უთოვლო ზამთარი (იანვრის საშ. ტემპ-რა 5,2°C), ძლიერ თბილი, ზომიერად ნოტიო ზაფხული (აგვისტოს საშ. ტემპ-რა 23,0°C), შეფარდებითი სინოტივე - 73%; ნალექების წლიური რაოდენობა — 1480 მმ, მზის ნათების ხანგრძლივობა 2160 სთ წელიწადში. სეზონი - მთელი წელი. ძირითადი სამკურნალო ფაქტორია გოგირდწყალბადიანი, ქლორიდულ-ნატრიუმიანი მინერ. წყალები საერთო მინერალიზაციით 6,0-14,0 გ/დმ³ და აზოტიანი, სულფიდური, ქლორიდულნატრიუმიანი მინერალური წყლები, საერთო მინერალიზაციით 5,2-7,4 გ/დმ³, ტემპერატურა 270 C⁰; დებიტი: 700 ათასი ლ/დღ-ღ), რ-საც იყენებდნენ აბაზანებისათვის სახსრების, პერიფერიული ნერვული სისტემის, გინეკოლოგიური და გულ-სისხლძარღვთა სისტემების ზოგიერთი დაავადების დროს. მ-ს 1938 მიენიჭა საკავშირო კურორტის წოდება, ფუნქციონირებდა სანატორიუმი, სანატორიუმის ტიპის რკინიგზის საავადმყოფო, საკურორტო პოლიკლინიკა.

მ-ს დამსვენებლები „ყავარჯნების სამარეს“ უწოდებდნენ, რადგან ძირითადად ყავარჯნებით სახსრების სამკურნალოდ ჩამოსულები უკან თავისი ფეხით ბრუნდებოდნენ. გასული საუკუნის 90-იან წლებში კურორტმა შეწყვიტა ფუნქციონირება.
